

V
0227.6
C43

13

駢志卷之十六

一集

海虞陳禹謨錫玄甫輯

辛部下

梁武帝迎佛髮

唐憲宗迎佛骨

南史梁大同五年扶南國遣使送生犀又言其國有佛髮長一丈二尺詔遣沙門釋靈寶隨使往迎之先是三年八月武帝改造阿育王佛塔出舊塔下舍利及佛爪髮髮青紺色衆僧以手伸之隨手長短放之則旋屈爲螽形按僧伽經云佛髮青而細猶如藕莖絲佛三昧經云我昔在宮沐頭以尺量髮長一丈二尺放已右旋

還成蠡文則與帝所得同也

舊唐書鳳翔法門寺有護國真身塔塔內有釋迦文佛指骨一節其書本傳法三十年一開開則歲豐人泰元和十四年正月上令中使杜英奇押宮人三十人持香花赴臨臯驛迎佛骨自光順門入大內留禁中三日乃送諸寺王公士庶奔走捨施唯恐在後百姓有廢業破產燒頂灼骨而求供養者韓愈素不喜佛上疏諫

以頭施人

以眼施人

水經注釋法顯所謂糺尸羅國漢言截頭也佛爲菩薩時以頭施人故因名國國東有投身飼餓虎處皆起塔

又陀衛國是阿育王子法益所治邑佛爲菩薩時亦于此國以眼施人其處亦起大塔

鉢容二斗少華投中便滿

鉢受三斗終日香花不滿

法顯傳陀衛國有佛鉢月氏王大興兵衆來伐此國欲持鉢去置鉢象上象不能進更作四輪車載然八象共牽復不進王知緣于是起塔留鉢供養鉢容二斗雜色而黑多四際分明厚可二分甚光澤貧人以少華投中便滿富人以多花供養正復百千萬斛終亦不滿

佛圖曰佛鉢青玉也受三斗許彼國寶之供養時願終日香花不滿則如言願一把滿則亦便如言

掘視惟有一石

改葬惟有空皮

晉書佛圖澄卒于鄴宮寺後有沙門從雍州來稱見澄西人關石季龍掘而視之惟有一石而無尸

舊唐書道士劉道合爲高宗合還丹丹成而上之咸亨中卒及帝營奉天宮遷道合之殯室弟子開棺將改葬其尸唯有空皮而背上開坼有似蟬蛻盡失其齒骨衆謂尸解高宗聞之不悅曰劉師爲我合藥自服仙去

伯陽乘青牛

君達騎青牛

列異傳老子西游關令尹喜望見其有紫氣浮關而老子果乘青牛而過

神仙傳封君達隴西人服鍊水銀年百歲視之如年三十許騎青牛故號青牛道人

青鳥西方來

赤龍東南上

漢武故事七月七日上于承華齋忽有一青鳥從西方來集殿前上問東方朔朔曰此王母欲來也有頃王母至有二青鳥如鳥侍王母傍

列仙傳陶安公者六安鑄冶師也數行火火一旦散上行紫色衝天安公伏冶下求哀須臾朱雀止冶上曰安公安公治與天通七月七日迎汝以赤龍至期赤龍到

大雨安公騎之東南上一城邑數萬人衆共送視之皆與辭決去

魚知名

鷄知名

蜀音錄東川降魔寺僧吉祥魁梧多力受鉢五鉢日夜誦經九函池中魚知其數以名召之皆出水面使去卽沒

列仙傳祝雞翁居尸鄉北山下養鷄百餘牢鷄皆有名字千餘頭暮棲于樹晝日放散呼名卽種別而至

舉羅張之得一隻鳥

以石擲之得一隻履

後漢王喬者河東人也顯宗世爲葉令喬有神術每月朔望常自縣詣臺朝帝怪其來數而不見車騎密令太史祠望之言其臨至輒有雙鳬從東南而來于是候鳬至舉羅張之但得一隻鳥焉乃詔上方驗視則四年中所賜尚書官屬履也

鄧德明南康記昔有盧耽仕州爲治中少棲仙術善解雲飛每夕輒凌虛歸家曉則還州嘗于元會至朝不及朝列化爲白鵠至閣前迴翔欲下威儀以石擲之得一隻履耽驚還就列内外左右莫不駭異時步騭爲廣州意甚惡之便以狀列聞遂至誅滅

朽索懸石試長房

白髮懸石試偉道

後漢費長房從仙翁入深山踐荆棘于羣虎之中留使獨處長房不恐又卧于空室以朽索懸萬斤石于心上衆蛇競來齧索且斷長房亦不移翁還撫之曰子可教也復使食糞糞中有三蟲臭穢特甚長房意惡之翁曰子幾得道恨于此不成如何長房辭歸翁與一竹杖曰騎此任所之則自至矣既至可以杖投葛陂中也又爲作一符曰以此主地上鬼神

真誥昔中山劉偉道學仙在嶠冢上積十二年仙人試之以石重十萬斤一白髮懸之使偉道卧其下偉道顏無變色心安體悅卧在其下積十二年仙人數試之無所不至已皆語之遂賜其神丹而白日昇天

服三氣

存三氣

真誥沈幼仲恒服三氣三氣之法存青氣白氣赤氣各如綫從東方日下來直入口中挹之九十過自飽便止爲之十年身中自有五色之氣遂得神仙此高元君太素內景法

又守玄白之道常旦旦坐卧任意存泥丸中有黑氣存心中有白氣臍中有黃氣三氣俱先如雲以覆身上因變成火火又繞身身通洞徹内外如此旦行之至日向中乃止于是服氣百二十過都畢道止如此使人長生

不死辟却萬害所謂知白守黑求死不得知黑守白萬邪消却忌食六畜肉及五辛之菜當別寢靜思尤忌房室

煮石爲糧

以石爲藥

神仙傳白石生者嘗煮白石爲糧嘗就白石居

後漢書火山山旁石皆焦鎔流數十里乃疑堅人取以爲藥

石腦

石髓

真誥姜伯真數在方山上取石腦石腦在方山北穴下

繁陽子昔亦取此服北竚山中亦有此物石腦故如石但小斑色而輒耳所在有之服此時時使人發熱又使人不渴

又周穆王北造崑崙之阿親飲絳山石髓食玉樹之實而方墓乎汲郡 又晉書嵇康遇王烈共入山烈嘗得石髓如飴卽自服半餘半與康皆凝而爲石

飲霞

服霧

論衡河東蒲坂項曼都好道學仙去三年而返家人問其狀都曰欲飲食仙人輒飲我以流霞每飲一杯數日不飢

真誥服霧法常以平旦于寢靜之中坐卧任已先閉目
內視髣髴如見五臟畢因口呼出氣二十四過臨目爲
之使目見五色之氣相繞纏在面上鬱然因又口內此
五色氣五十過畢咽唾六十過畢乃微呪曰太霞發暉
靈霧四遷結氣宛屈五色洞天神烟合啓金石華真謁
鬱紫空鍊形保全出景藏幽五靈化分合明扇虛時乘
六雲和攝我身上昇九天畢又叩齒七通咽液七過乃
開目事訖此道神妙又神州玄都多有得此術者久行
之常乘雲霧而游

上巳取槐子

上寅採甘菊

梁書庾肩吾常服槐實年七十餘目看細字鬢皆黑

太清草木方槐以十月上巳取子服之好顏色長生通
神

玉函方王子喬變白增年方甘菊三月上寅日採名曰
玉英六月上寅日採名曰容成九月上寅日採名曰金
精十二月上寅日採名曰長生長生者根莖是也

五穀爲養五果爲助

五畜爲益五菜爲充

黃帝內經藏氣法時論肝色青宜食甘粳米牛肉棗葵

皆甘

肝性喜急故食甘物而取其寬緩也

心色赤宜食酸小豆犬肉李韭

皆酸

心性喜緩故食酸物而取其收斂也

肺色白宜食苦麥羊肉杏薤皆

苦

肺喜氣逆故食苦物而取其宜洩也

脾色黃宜食鹹大豆豕肉栗藿皆

鹹

究斯宜食乃調利開機之義也腎為胃關脾與胃合故假鹹柔粟以利其關關利而胃氣乃行胃行而脾

氣方化故應脾宜味與眾不同也

腎色黑宜食辛黃黍雞肉桃蔥皆辛

腎性喜燥故食辛物而取其津潤也

辛散酸收甘緩苦堅鹹栗毒藥攻邪

藥謂金玉土石草木菜食虫魚鳥獸之類皆可以祛邪養正者也然辟邪安正惟毒乃能以其能然故通謂之

毒藥

五穀為養

謂粳米小豆麥大豆黃黍也

五果為助

謂桃李杏栗棗也

畜為益

謂牛羊豕犬雞也

五菜為充

謂葵藿薤蔥韭也

氣味合而服之

以補精益氣此五者有辛酸甘苦鹹各有所利或散或

收或緩或急或堅或栗四時五藏並隨五味所宜也

五味所入

五藏所惡

五藏所藏

五氣所病

五味所禁

五藏所化

五藏所主

五精所并

黃帝內經宣明五氣篇五味所入酸入肝辛入肺苦入

心鹹入腎甘入脾是謂五入

五味所禁辛走氣氣病

無多食辛鹹走血血病無多食鹹苦走骨骨病無多食

苦甘走肉肉病無多食甘酸走筋筋病無多食酸是謂

五禁無令多食

五藏所惡心惡熱

熱則肺潰濁

肺惡寒

氣留滯

肝惡風

風則筋燥急

脾惡濕

濕則肉痿腫

腎惡燥

燥則精竭涸

謂五惡

五藏化液心為汗

泄于皮

肺為涕

潤于鼻

為淚

注于眼

脾為涎

溢于唇

腎為唾

生于牙

是謂五液

五藏所藏心藏神

精氣之化成也靈樞經曰兩精相薄謂之神

肺藏魄

之匡佐也靈樞經曰並

肝藏魂

神氣之輔弱也靈樞經曰隨神而往來者謂之

魂

脾藏意

記而不忘者也靈樞經曰心有所憶謂之意

腎藏志

專意而不移者也靈樞經

曰意之所存謂之志腎受五臟六腑之精元氣是謂五

臟所藏

五臟所主心主脉

壅遏榮氣應息而動也

肺主皮

包裹

間拒諸邪也

肝主筋

束絡機關隨神而過也

脾主肉

覆藏筋骨通行衛氣也

腎主

骨

張筋化髓幹以立身也

是謂五主

五氣所病心爲噫肺爲欬

肝爲語脾爲吞腎爲欠爲噎胃爲氣逆爲噦爲恐大小

腸爲泄下焦溢爲水膀胱不利爲癰不約爲遺溺膽爲

怒是謂五病

五氣所并精氣并于心則喜并于肺則

悲并于肝則憂并于脾則畏并于腎則恐是謂五并虛

而相并者也

十二官

十二節

黃帝內經靈蘭秘典論黃帝問曰願聞十二藏之相使

貴賤何如岐伯對曰悉乎哉問也請遂言之心者君主

之官也神明出焉肺者相傳之官治節出焉肝者將軍

之官謀慮出焉膽者中正之官決斷出焉膻中者臣使

之官喜樂出焉脾胃者倉廩之官五味出焉大腸者傳

道之官變化出焉小腸者受盛之官化物出焉腎者作

強之官伎巧出焉三焦者決瀆之官水道出焉膀胱者

州都之官津液藏焉氣化則能出矣凡此十二官者不

得相失也故主明則下安以此養生則壽歿世不殆以

爲天下則大昌主不明則十二官危使道閉塞而不通

形乃大傷以此養生則殃以爲天下者其宗大危戒之

戒之

又寶命全形論岐伯曰夫人生于地懸命于天天地合氣命之曰人人能應四時者天地爲之父母知萬物者謂之天子天有陰陽人有十二節二經脈也天有寒暑人有虛實能經天地陰陽之化者不失四時知十二節之理者聖智不能欺也

風者百病之長

風者百病之始

黃帝內經風論篇以春甲乙傷于風者爲肝風以夏丙丁傷於風者爲心風以季夏戊己傷于邪者爲脾風以秋庚辛中於邪者爲肺風以冬壬癸中于邪者爲腎風風中五藏六府之俞亦爲藏府之風各入其門戶所中則爲偏風風氣循風府而上則爲腦風風入係頭則爲目風眼寒飲酒中寒則爲漏風入房汗出中風則爲內風新沐中風則爲首風久風入中則爲腸風飧泄外在腠理則爲泄風故風者百病之長也至其變化乃爲他病也無常方然致有風氣也

又骨空論黃帝問曰余聞風者百病之始也以鍼治之奈何岐伯對曰風從外入令人振寒汗出頭痛身重惡

寒治在風府

風府穴也在項上入髮際同身寸之一寸穴中督脈足太陽之會刺可入同身寸

之四分若灸者可灸五壯調其陰陽不足則補有餘則寫用鍼之道必法天常盛瀉虛補此其常也

風雨傷人先客于皮膚

邪客于形先舍于皮毛

黃帝內經調經論岐伯曰風雨之傷人也先客于皮膚傳入于孫脉孫脉滿則傳入于絡脉絡脉滿則輸于大經脉血氣與邪并客于分腠之間其脉堅大故曰實實者外堅充滿不可按之則痛

又繆刺論岐伯曰夫邪之客于形也必先舍于皮毛留而不去入舍于孫脉留而不去入舍于絡脉留而不去入舍于經脉內連五藏散于腸胃陰陽俱感五藏乃傷此邪之從皮毛而入極于五藏之次也如此則治其經焉今邪客于皮毛入舍于孫絡留而不去閉塞不通不得入于經流溢于大絡而生奇病也夫邪客大絡者左注右右注左上下左右與經相干而布于四末其氣無常處不入于經俞命曰繆刺

因四氣而調神

因五方而異治

黃帝內經四時調神大論春三月此謂發陳天地俱生萬物以榮夜卧早起廣步於庭被髮緩形以使志生生而勿殺予而勿奪賞而勿罰此春氣之應養生之道也逆之則傷肝夏爲寒變奉長者少夏三月此謂蕃秀天地氣交萬物華實夜卧早起無厭于日使志無怒使華英成秀使氣得泄若所愛在外此夏氣之應養長之道

也逆之則傷心秋爲痎瘧奉收者少冬至重病秋三月此謂容平天氣以急地氣以明早臥早起與鷄俱興使志安寧以緩秋刑收斂神氣使秋氣平無外其志使肺氣清此秋氣之應養收之道也逆之則傷肺冬爲殭泄奉藏者少冬三月此謂閉藏水冰地坼無擾乎陽早卧晚起必待日光使志若伏若匿若有私意若已有得去寒就溫無泄皮膚使氣亟奪此冬氣之應養藏之道也逆之則傷腎春爲痿厥奉生者少

又異法方宜論篇黃帝問曰醫之治病也一病而治各不同皆愈何也岐伯對曰地勢使然也故東方之域天地之所始生也魚鹽之地海濱傍水其民食魚而嗜鹹皆安其處美其食魚者使人熱中鹽者勝血故其民皆黑色疎理其病皆爲癰瘍其治宜砭石故砭石者亦從東方來西方者金玉之域沙石之處天地之所收引也其民陵居而多風水土剛強其民不衣而褐薦其民華食而脂肥故邪不能傷其形體其病生于內其治宜毒藥故毒藥者亦從西方來北方者天地所閉藏之域也其地高陵居風寒水冽其民樂野處而乳食藏寒生滿病其治宜灸焫故灸焫者亦從北方來南方者天地所長養陽之所盛處也其地下水土弱霧露之所聚也其民嗜酸而食胘故其民皆緻理而赤色其病攣痺其治宜微鍼故九鍼者亦從南方來中央者其地平以濕天

地所以生萬物也衆其民食雜而不勞故其病多痿厥寒熱其治宜導引按蹻故導引按蹻者亦從中央出也故聖人雜合以治各得其所宜故治所以異而病皆愈者得病之情知治之大體也

商山四皓

九巖四皓

按四皓東園公姓唐名秉字宣明綺里先生字季夏黃公姓崔名廣字少通角里先生姓周名術字元道前涼錄張重華問索綏曰四皓既安太子住乎還山乎綏答未悉重華曰卿不知乎四皓死于長安有四皓冢爲不還山也

南史徐伯珍宅南九里有高山班固謂之九巖山後漢龍丘萇隱處也山多龍鬚檉柏望之五采世呼爲婦人巖伯珍移居之家甚貧窶弟兄四人皆白首相對時人呼爲四皓

焦先瓜牛廬

楊沛瓜牛廬

魏略隱者焦先自作一瓜牛廬淨掃其中營木爲牀布草蓐其上至天寒時篝火以自炙呻吟獨語飢則出爲人客作飽食而已不取其直又出于道中邂逅與人相遇輒下道藏匿或問其故常言草茅之人與狐兔同群不肯妄語

裴松之云按魏略焦先及楊沛並作瓜牛廬止其中以爲瓜當作蝸蝸牛螺中之有角者也俗或呼爲黃犢先等作園舍形如蝸牛藪故謂之蝸牛廬

孫登嘯蘇門山

孫登嘯宜陽山

晉書阮籍嘗于蘇門山遇孫登與商略終古及栖神導氣之術登皆不應籍因長嘯而退至半嶺聞有聲若鸞鳳之音響乎巖谷乃登之嘯也

臧榮緒晉書稱孫登嘗經宜陽山作炭人見之與語登不應作炭者覺其精神非常咸共傳說太祖聞之使阮籍往視與語亦不應籍曰大奇登笑將求與俱出登不

肯籍因別去登上峯行且嘯如簫韶笙簧之音聲振山谷籍怪而問作炭人作炭人曰故是向人聲籍更求之不知所止推問久之乃知姓名 酈道元曰案孫綽敘

高士傳言在蘇門山又別作登傳孫盛晉魏春秋亦言在蘇門山又不列姓名阮嗣宗感之著大人先生論言吾不知其人卽神游自得不得與物交阮氏尚不能動其英標復不識何人而能得其姓名 真誥趙威伯善嘯

嘯如百鳥雜鳴或如風激衆林或如伐鼓之音時在天市壇上奮然北向長嘯呼風須臾雲翔其上衡氣動林

或冥霧飈合或露雨其濛矣

評曰按晉書登嘗往宜陽山與榮緒所載畧同

而特不及其嘯余曾游蘇門其上蓋有嘯臺云榮緒合二事而并載之豈別有據耶

沈道虔凡十二命皆不就
徐伯珍應十二召皆便退

南史沈道虔居石山精廬與諸孤兄子共金庾之資困
不改節受琴于戴逵王敬弘深貴重之郡守府凡十二
命皆不就

又徐伯珍叔父璠之與顏延之友善還袪蒙山立精舍
講授伯珍往從學積十年究尋經史游學者多依之太
守琅邪王曇生吳郡張淹並加禮辟伯珍應召便退如
此者凡十二焉

賜竹根如意

賜竹節如意

南史齊建元元年冬徵明僧紹爲正員郎稱疾不就
後帝與崔思祖書令僧紹與慶符俱歸僧紹曰不食周
粟而食周薇古猶發議在今寧得息談邪聊以爲笑慶
符罷任僧紹隨歸住江乘攝山僧紹聞沙門釋僧遠夙
德往候定林寺高帝欲出寺見之僧遠問僧紹曰天子
若來居士若爲相對僧紹曰山藪之人政當鑿坏以遁
若辭不獲命便當依戴公故事旣而遁還攝山建棲霞
寺而居之高帝甚以爲恨昔戴顓高卧牖下以山人之
服加其身僧紹故云高帝後謂慶符曰卿兄高尚其事
亦堯之外臣朕夢想幽人固已勤矣所謂逕路絕風雲
通仍賜竹根如意筍箨冠隱者以爲榮焉

北堂書鈔劉義慶啓事云恩旨賜臣犀鏤竹節如意目所未睹

五柳先生

七松處士

晉書陶潛少懷高尚博學善屬文穎脫不羈任真自得爲鄉鄰之所貴嘗著五柳先生傳以自況曰先生不知何許人不詳姓字宅邊有五柳樹因以爲號焉

南部新書鄭薰旣老號所居爲隱巖時小松七本于庭自號七松處士

杜子美與野老相狎

司空圖與野老同席

舊唐書杜甫于成都浣花里種竹植樹結廬枕江縱酒嘯詠與田夫野老相狎蕩無拘檢嚴武過之有時不冠其傲誕如此

又司空圖布衣鳩杖出則以女家人鸞臺自隨歲時村社雩祭祠禱鼓舞會集團必造之與野老同席曾無傲色

文取季隗衰取叔隗

策納大橋瑜納小橋

左傳晉公子重耳奔狄狄人伐虜咎如獲其二女叔隗季隗納諸公子公子取季隗生伯儵叔劉以叔隗妻趙衰生盾

吳志孫策欲取荊州以周瑜爲中護軍領江夏太守從
攻皖拔之時得橋公兩女皆國色也策自納大橋瑜納
小橋江表傳策從容戲瑜曰橋公二女雖流離得吾
二人作壻亦足爲歡

結裙

持履

拾遺記成帝常以三秋閒日與飛鷺戲于太液池以沙
棠木爲舟貴其不沉沒也每輕風時至飛鷺殆欲隨風
入水帝以翠纓結飛鷺之裙常怨曰妾微賤何復得預
纓裙之遊今太液池尚有避風臺卽飛鷺結裙之處
趙飛燕外傳帝與后游太液池中流歌酣風大起后順

忘善則惡心生沃土之民不材淫也瘠土之民莫不嚮
義勞也

魏志注鍾會母傳曰夫人性矜嚴明于教訓會雖童稚
勤見規誨年四歲授孝經七歲誦論語八歲誦詩十歲
誦尚書十一誦易十二誦春秋左氏傳國語十三誦周
禮禮記十四誦成侯易記十五使入太學問四方奇文
異訓謂會曰學猥則倦倦則易怠吾懼汝之意怠故以
漸訓汝今可以獨學矣雅好書籍涉歷衆書特好易老
子每讀易孔子說鳴鶴在陰勞謙君子籍用白茅不出
戶庭之義每使會反覆讀之曰易三百餘爻仲尼特說
此者以謙恭慎密樞機之發行已至要榮身所由故也

慎斯術以往足爲君子矣正始八年會爲尚書郎夫人執會手而誨之曰汝弱冠見敘人情不能自足自足則損在其中矣

截髮供費

截髮供饌

列女傳樂羊學書其妻貞義截髮以供其費

晉書陶侃早孤貧爲縣吏鄱陽孝廉范逵嘗過侃時倉卒無以待賓其母乃截髮得雙髮以易酒肴樂飲極歡雖僕從亦過所望及逵去侃追送百餘里逵曰卿欲仕郡乎侃曰欲之困于無津耳逵過廬江太守張夔稱美之夔召爲督郵 又周顗母李氏字絡秀少時在室顗

父浚爲安東將軍時嘗出獵遇雨過至絡秀之家會其父兄不在絡秀聞浚至與一婢于內宰豬羊具數十人之饌甚精辦而不聞人聲浚怪使覘之獨見一女子甚美浚因求爲妾其父兄不許絡秀曰門戶殄悴何惜一女若聯姻貴族將來有大益矣父兄許之遂生顗及嵩謨

孟宗母還鮓

陶侃母封鮓

吳錄孟宗初爲鹽池司馬自能結網手以捕魚作鮓寄母母因以還之曰汝爲魚官而以鮓寄我非避嫌也晉書陶侃初爲尋陽縣吏嘗監魚梁以一坩鮓遺母湛

氏封鮒及書責侃曰爾爲吏以官物遺我非唯不能益我乃以增我憂矣

王經母謂經當知止

潘岳母謂岳當知足

魏志清河王經稱冀州名士甘露中爲尚書坐高貴鄉公事誅始經爲郡守經母謂經曰汝田家子今仕至二千石物太過不祥可以止矣經不能從歷二州刺史司隸校尉終以致敗

晉書賈謐二十四友潘岳爲首謐晉書限斷亦岳之辭也其母數誚之曰爾當知足而乾沒不已乎而岳終不

能改

按漢書張湯傳注服虔曰乾沒射成敗也如淳曰得利爲乾沒失利爲沒三國志裴松之注曰度說未

暢淳說又不可了思謂乾讀宜爲乾燥之乾蓋謂有所徵射不計乾燥之與沈沒而爲之評曰知足知止玄元訓也二子不知而二母知之誰謂并禕之識不足參義万乎君子謂二母當與知廢知興者並傳

劉氏集諸長幼喻以忠節

孟氏激厲文武喻之逆順

北史梓潼太守苟金龍妻劉氏宣武時金龍爲郡帶關城戍主梁人攻圍會金龍疾病不堪部分劉遂厲城人修理戰具夜悉登城拒戰百有餘日并在外城尋爲賊陷城中絕水渴死者多劉乃集諸長幼喻以忠節遂相率告訴于天俱時號叫俄而澍雨劉命出公私布絹及至衣服懸之城內絞而取水所有雜器悉儲之于是人心益固會益州刺史傅豎眼將至梁人乃退

又任城國太妃孟氏者尚書任城王澄之母也澄爲楊州日率衆出討於後賊帥姜慶真襲陷羅城長史韋績倉卒孟乃勒兵登陴激厲文武喻之逆順於是咸有奮志賊不能克卒以全城

曹娥號哭投江

女絡哀哭自沉

後漢書孝女曹娥者會稽上虞人也父盱能絃歌爲巫祝漢安二年五月五日于縣江汜濤迎婆娑神溺死不得屍骸娥年十四乃泐江號哭晝夜不絕聲旬有七日遂投江而死至元嘉元年縣長度尚改葬娥于江南道傍爲立碑焉

按項原列女傳娥投衣于水祝曰父屍所在衣當沉衣隨流至一處而沉娥遂隨衣而沒

華陽國志符縣長趙祉遣吏先尼和拜檄巴郡守過成瑞灘死子賢求喪不得女絡年二十五廼分金珠二錦囊繫兒頭下至二年二月十五日女絡乃乘小船至父沒所哀哭自沉見夢告賢曰至二十一日與父尸俱出至日父子浮出縣言郡太守蕭登高上之尚書遣戶曹掾爲之立碑

趙娥袖劒報父讐

孫氏揮杖殺夫讐

魏志龐涓外祖父趙安爲同縣李壽所殺涓舅兄弟三人同時病死壽家喜涓母娥自傷父讐不報乃帷車袖

劒白日刺壽于都亭前訖徐詣縣顏色不變曰父讐已報請受戮祿福長尹嘉解印綬縱娥娥不肯去遂疆載還家會赦得免州郡歎賞刊石表閭

北史鄒縣女子孫氏男玉者夫爲零陵縣人所殺男玉追執讐人欲自殺之其弟止而不聽男玉曰女人出適以夫爲天當親自復雪云何假人之手遂以杖毆殺之有司處死以聞獻文詔曰男玉重節輕身以義犯法緣情定臯理在可原其特恕之

隨子作東征賦

隨夫作南征賦

舊唐書宋庭瑜妻魏氏善屬文先天中庭瑜自司農少

卿左遷涪州別駕魏氏隨夫之任中路作南征賦以叙志詞甚典美

羊爲汝徘徊何況于人

我見汝亦憐何況老奴

南史宋文帝乘羊車每至潘淑妃戶羊輒舐地不去帝曰羊乃爲汝徘徊何況于人乎

世說桓溫平蜀以李勢妹爲妾甚有寵常著齋後主始不知旣聞與數十婢拔白刃襲之正值李梳頭髮委藉地膚色玉曜不爲動容徐曰國破家亡無心至此今日若能見殺乃是本懷主於是擲刃前抱之曰阿子我見

馬志 卷十一
汝亦憐何況老奴遂善之

高辛女配犬

阿史那交狼

後漢書昔高辛氏有犬戎之寇帝患其侵暴而征伐不
尅乃訪募天下有能得犬戎之將吳將軍頭者購黃金
千鎰邑萬家又妻以少女時帝有畜狗其毛五采名曰
槃瓠下令之後槃瓠遂銜人頭造闕下群臣怪而諗之
乃吳將軍首也帝大喜而計槃瓠不可妻之以女又無
封爵之道議欲有報而未知所宜女聞之以爲帝皇下
令不可違信因請行帝不得已乃以女配槃瓠槃瓠得
女負而走入南山止石室中所處險絕人跡不至于是

女解去衣裳爲僕監之結著獨力之衣帝悲思之遣使
尋求輒遇風雨震晦使者不得進經三年生子一十二
人六男六女槃瓠死後因自相夫妻織績木皮染以草
實好五色衣服製裁皆有尾形其母後歸以狀白帝于
是使迎致諸子衣裳斑蘭語言侏離好入山壑不樂平
曠帝順其意賜以名山廣澤其後滋蔓號曰蠻夷 又
陷北記北狗國人身狗首長毛不衣手搏猛獸語爲犬
嗥其妻皆人能漢語生男爲狗女爲人自婚嫁穴居食
生而妻女人食云嘗有中國人至其國其妻憐之使逃
歸與其飭十餘隻數其走十餘里遺一飭狗夫之見其
其家物必銜而歸則不能追矣

北史突厥者其先居西海之右獨爲部落蓋匈奴之別種也姓阿史那氏後爲鄰國所破盡滅其族有一兒年且十歲兵人見其小不忍殺之乃刖足斷其臂棄草澤中有牝狼以肉餌之及長與狼交合遂有孕焉彼王聞此兒尚在重遣殺之使者見在狼側并欲殺狼于時若有神物投狼於西海之東落高昌國西北山山有洞穴穴內有平壤茂草周迴數百里四面俱山狼匿其中遂生十男十男長外託妻孕其後各爲一姓阿史那卽其一也最賢遂爲君長故牙門建狼頭纛示不忘本也

漢公主妻烏孫昆莫自治宮室

唐公主妻吐蕃弄贊遂立宮室

漢書元封中遣江都王建女細君爲公主以妻烏孫昆莫賜乘輿服御物爲備官屬宦官侍御數百人贈送甚盛昆莫以爲右夫人匈奴亦遣女妻昆莫昆莫以爲左夫人公主至其國自治宮室居歲時一再與昆莫會置酒飲食以幣帛賜王左右貴人昆莫年老語言不通公主悲愁自爲作歌曰吾家嫁我今天一方遠託異國兮烏孫王穹廬爲室兮旃爲牆以肉爲食兮酪爲漿居常思土兮心內傷願爲黃鵠兮歸故鄉天子聞而憐之間歲遣使者持帷帳錦繡給遺焉

新唐書貞觀十五年妻吐蕃弄贊宗女文成公主詔江夏王道宗持節護送築館河源王之國弄贊率兵次栢

海親迎見道宗執壻禮恭甚見中國服飾之美縮縮醜
沮歸國自以其先未有昏帝女者乃爲公主築一城以
夸後世遂立宮室以居公主惡國人赭面弄贊下令國
中禁之自襦氍罽襲純綃爲華風遣諸豪子弟入國學
習詩書又請儒者典書疏

烏桓婦至嫁時方養髮

鮮卑俗唯婚姻先髡頭

後漢書烏桓以髡頭爲輕便婦人至嫁時方養髮分爲

髻著句決飾以金碧猶中國有箇步搖

注云箇音吉悔反字或爲幘婦

人首飾也

又鮮卑言語習俗與烏桓同唯婚姻先髡頭以季春月

大會于饒樂水上飲讌畢然後配合

夜郎剖竹而生

哀牢觸木而感

後漢書夜郎者初有女子浣于遯水有三節大竹流入
足間聞其中有號聲剖竹視之得一男兒歸而養之及
長有才武自立爲夜郎侯以竹爲姓武帝元鼎六年平
南夷爲牂牁郡夜郎侯迎降天子賜其王印綬後遂殺
之夷獠咸以竹王非血氣所生甚重之求爲立後牂牁
太守吳霸以聞天子乃封其三子爲侯死配食其父今
夜郎縣有竹王三郎神是也

又哀牢夷者其先有婦人名沙壹居于牢山嘗捕魚水

中觸沈木若有感因懷妊十月產子男十人後沈木化為龍出水上沙壹忽聞龍語曰若爲我生子今悉何在九子見龍驚走獨小子不能去背龍而坐龍因舐之其母鳥語謂背爲九謂坐爲隆因名子曰九隆及後長大諸兄以九隆能爲父所舐而黥遂共推以爲王後牢山下有一夫一婦復生十女子九隆兄弟皆娶以爲妻後漸相滋長種人皆刻畫其身象龍文衣著尾
弁辰國兒生以石厭頭
康居國子生以蜜內口

魏志弁辰國兒生以石厭其頭欲其褊今辰國人皆褊頭

長口常持言掌持錢如膠之黏物

巴師勇銳歌舞

賓民銳氣喜舞

華陽國志周武王伐紂實得巴蜀之師著乎尚書巴師勇銳歌舞以凌殷人倒戈故世稱之曰武王伐紂前歌後舞也

又閬中有渝水賓民多居水左右天性勁勇初爲漢前鋒陷陣銳氣喜舞帝善之曰此武王伐紂之歌也乃令樂人習學之今所謂巴渝舞也

周時肅慎貢楛矢

魏時肅慎貢楛矢

國語仲尼在陳有隼集于陳侯之庭而死楛矢貫之石
矸其長尺有咫陳惠公使人以隼如仲尼之館問之仲
尼曰隼之來也遠矣此肅慎氏之矢也昔武王克商通
道于九夷百蠻使各以其方賄來貢使無忘職業于是
肅慎氏貢楛矢石矸其長尺有咫先王欲昭其令德之
致遠也以示後人使永監焉故銘其楛焉肅慎氏之貢
矢以分大姬配虞胡公而封諸陳古者分同姓以珍玉
展親也分異姓以遠方之職貢使無忘服也故分陳以
肅慎氏之貢君若使有司求諸故府其可得也使求得
之金楛如之

魏志景元三年夏四月遼東郡言肅慎國遣使重譯入
貢獻其國弓三十張長三尺五寸楛矢長一尺八寸石
弩三百枚皮骨鐵雜鎧二十領豹皮四百枚

罽賓國獻褥特鼠

波斯國獻活褥蛇

舊唐書貞觀十六年罽賓國遣使獻褥特鼠喙尖而尾
赤能食蛇有被蛇螫者鼠輒嗅而尿之其瘡立愈

又波斯國伊嗣侯遣使獻一獸名活褥蛇形類鼠而色
青身長八九寸入穴取鼠

以十一月爲正

以十二月爲首

舊唐書東女國以十一月爲正

又康國卽漢康居國以十二月爲歲首

十一月鼓舞乞寒

盛暑節激氣成涼

舊唐書康居國頗有佛法至十一月鼓舞乞寒以水相潑盛爲戲樂

又拂菻國每至盛暑之節人厭暑熱乃厭水潛流上徧屋宇機制巧密人莫之知觀者惟聞屋上泉鳴俄見四簷飛溜懸波如瀑激氣成涼風其巧妙如此

以駝候風

以鳥卜歲

舊唐書吐谷渾西北有流沙數百里夏有熱風傷斃行旅風之將至老駝便知之則引項而鳴以口鼻埋沙中人以爲候卽以氊擁蔽口鼻而避其患

又東女國以十一月爲正其俗每至十月令巫者齋楮詣山中散糟麥于空大呪呼鳥俄而有鳥如鷄飛入巫者之懷因剖腹視之每有一殼來歲必登若有霜雪必多災異其俗信之名爲鳥卜

殼新唐書作穀

灼骨以卜

觀蹄以占

後漢書倭國灼骨以卜用决吉凶

魏志夫餘國殺牛觀蹄以占吉凶蹄解者凶合者吉

以丹朱坌身
以麝香塗身

後漢書倭國男衣皆橫幅結束相連女人被髮屈紒衣如單被貫頭而著之並丹朱坌身如中國之用粉也

說文

曰坌塵也
音浦頓反

舊唐書林邑國俗皆徒跣得麝香以塗身一日之中再塗再洗又後漢書夫餘國好養豕食其肉衣其皮冬以豕膏塗身厚數分以禦風寒夏則裸袒以尺布蔽其前後

漂國不衣繒帛

于闐初無桑蠶

舊唐書漂國好生惡殺其理無刑名桎梏之具犯罪者皆以竹五十本束之復犯者撻其背數至五輕者止三殺人者戮之男女七歲則落髮止寺舍依桑門至二十不悟佛理乃復長髮爲居人其衣服悉以白氎爲朝霞繞腰而已不衣繒帛云出於蠶爲其傷生故也

新唐書于闐初無桑蠶焉隣國不肯出其王卽求婚許之將迎乃告曰國無帛可持蠶自爲衣女聞置蠶帽絮中關守不敢驗自是始有蠶女刻石約無殺蠶蛾飛盡乃治繭

張革爲屋

釀麋爲酒

胡嶠陷北記東女真善射多牛鹿野狗其人無定居行以牛負物遇雨則張革爲屋常作鹿鳴呼鹿而射之食其生肉

又東女真能釀麋爲酒醉而縛之而睡醒而後解不然則殺人

高昌有蒲萄酒

龜茲饒蒲萄酒

舊唐書高昌厥土良沃穀麥歲再熟有蒲萄酒

又龜茲國饒蒲萄酒富室至數百碩 又漢書大宛左

右以蒲萄爲酒富人藏酒至萬餘石久者至數十歲不

林邑國以檳榔汁爲酒

訶陵國以椰樹花爲酒

舊唐書林邑國以檳榔汁爲酒有結遼鳥能解人語

又訶陵國俗以椰樹花爲酒其樹生花長三尺餘大如人腦割之取汁以成酒味甘飲之亦醉

夫餘國譯者詭手據地

天竺國敬者舐足摩踵

魏志夫餘譯人傳辭皆詭手據地竊語 又倭人見大

人所敬但搏手以當跪拜

舊唐書天竺國人皆深目長鼻致敬極者舐足摩踵

又吐蕃拜必兩手據地作狗吠之聲以身再揖而止

淮南子曰胡人彈骨越人齧臂中國歃血也所由各異其於信一也三苗髻首羌人括領中國冠笄越人勸髮其於服一也

羸王

鴈臣

漢書龜茲王乃羸王也

洛陽伽藍記元魏時北夷酋長遣子入侍者常春秋去避中國之熱時人謂之鴈臣

象踐

鱷食

唐書南蠻環王衛兵五千戰乘象率象千馬四百分前後不設刑有罪者使象踐之 又驃國有巨白象高百

尺訟者焚香踞象前自思是非而退有災疫王亦焚香

對象踞自咎

朝野僉載安南有象能知人曲直有鬪

訟者行立而齧之有理者即過負心者以鼻捲之擲空中數丈以牙接之應時碎矣莫敢競者

吳時外國傳鱷魚大者長二三丈有四足似守宮常吞

食人扶南王范尋敕捕取置溝塹中尋有所忿者縛以

食鱷若罪當死鱷不食便解放以爲無罪 又南史林

邑國于城溝中養鱷魚門外圍虎有罪者輒以餒猛獸

及鱷不食爲無罪三日乃放之 瀛涯勝覽占城國有

鱷魚潭有爭訟官不能斷者則令二人騎水牛過此潭

曲者鱣魚出而食之直者雖過數次鱣出而不食也

胡蝗

胡荒

晉陽秋司冀青雍蝗食茅草皆盡石勒與蝗競取民禾
百姓謂之胡蝗

北史孝昌中山胡劉彞升自稱天子年號神嘉居雲陽
谷西土歲被其寇謂之胡荒